

詩

經

剖

疑

詩經剖疑卷之二十一

閩中後學曹學佺謹撰

大雅

抑抑威儀維德之隅人亦有言靡哲不愚庶人之愚亦職維疾哲人之愚亦維斯戾

疾叶集二反

抑抑密也隅廉角也謂德本渾融有威可畏有儀可象則如室之有稜角也是威儀亦不可少矣愚者哲者皆由斯道何能外之今則愚者固愚而哲者亦愚愚者之愚是其所也哲者之愚亦至於是哉爲下文荒酒湛樂張本

無競維人四方其訓之有覺德行四國順之訐謏
定命遠猶辰告敬慎威儀維民之則

告叶古
得反

莫彊於人而四方其訓之莫徑于德行而四國
其順之故爲人君者以大謨而定乎天命則有
遠猶而辰告者不招之而至也敬慎其威儀而
不忒則民自以爲法式者不約之而齊也要之
民何訓民何順以式于有德而已矣

其在于今興迷亂于政顛覆厥德荒湛于酒女雖
湛樂從弗念厥紹罔敷求先王克共明刑

今叶音經政叶音征酒叶子小反
共音拱刑叶胡光反

顛覆者迷亂之因荒酒

樂於酒則何以紹求先王克其明刑哉信乎厲王之世無復文武成康之舊矣

肆皇天弗尚如彼流泉無淪胥以亡夙興夜寐酒掃庭內維民之章脩爾車馬弓矢戎兵用戒戎作

用遏蠻方

尚叶平聲兵叶瞞亡反遏音剔

此復呼天而冀王之或悟也弗尚者勿以此尚之也尚之則悔之無日如彼流泉淪胥以亡皆所不免予願天勿尚之也勿尚則易湛樂而爲振作夙興二句似是成語借酒掃以明戒除之

意民章重在律令上卽克共明刑也惟脩之內故能治外以遏蠻方

質爾人民謹爾侯度用戒不虞慎爾出話敬爾威儀無不柔嘉白圭之玷尚可磨也斯言之玷不可爲也

虞叶元具反儀叶牛何反嘉叶居何反爲叶吾何反

此尋上章弗尚來謹侯度戒不虞慎出話敬威儀皆民之章也民章柔嘉矣而尤致重于斯言也

無易由言無曰苟矣莫捫朕舌言不可逝矣無言不讎無德不報惠于朋友庶民小子子孫繩繩萬

民靡不承

逃音折 離叶市又報叶蒲救反
友叶羽已反子叶獎里反

言之玷不可爲也言之逝不可追也且又無不
報讎烏可不慎耶一言語之微而惠朋友以及
庶民繼子孫以及萬民靡不承之其所關係甚
鉅如此無不讎報於斯見矣

視爾友君子輯柔爾顏不遐有愆相在爾室尚不
愧于屋漏無曰不顯莫予云覲神之格思不可度
思矧可射思

顏叶魚堅反格叶剛鶴反
射叶弋灼反

諸侯友邦曰友君子輯和也上章慎言而此云
和色也言貌之愆不在遠者屋漏之不愧神明

之來格無時無地而可以忽畧也

辟爾爲德俾臧俾嘉淑慎爾止不愆于儀不僭不
賊鮮不爲則投我以桃報之以李彼童而角實虹
小子

嘉儀子叶俱見上

爲人上者苟脩其德而慎其容止則其下化之
無僭僞殘賊之行而民鮮不以爲法矣譬如投
之以桃而報之以李不可誣也今無其實而求
民則之譬若童牛而求有角之用其誰信之祇
自瀆而已虹潰也

荏染柔木言緡之絲溫溫恭人維德之基其維哲

人告之話言順德之行其維愚人覆謂我僭民各

有心

絲叶新夷反
僭叶七尋反

荏染柔貌柔木柔忍之木也緡綸也被之綸以
爲弓也話言古之善言也覆猶反也僭越也民
各有心謂人心不同難以強從而溫恭者爲哲
覆僭者爲愚也則其所從違可見矣

於乎小子未知臧否匪手攜之言示之事匪面命
之言提其耳借曰未知亦既抱子民之靡盈誰夙
知而莫成

子叶見上否音卹事叶上止反
莫音暮

此呼聽言者而命之借曰未知以未知此言之

臧否也卽耳提面命言之諄諄而聽藐藐者也
但一云抱子一云旣髦猶俗語蠢到髮白耳

昊天孔昭我生靡樂視爾夢夢我心慘慘誨爾諄諄聽我藐藐匪用爲教覆用爲虐借曰未知亦聿

旣耄

昭叶音灼夢音蒙慘音慘叶七各反
藐音麥教叶入聲耄叶音莫

於乎小子告爾舊止聽用我謀庶無大悔天方艱
難曰喪厥國取譬不遠昊天不忒回遘其德俾民
太棘恂國叶俱見上

舊止舊章也大悔卽喪厥國之意回遘邪僻也
此復丁寧而告戒之序云衛武公刺厲王以自

倣也玩其詞語亦似倣列侯者卽上篇異事同僚之意

抑十二章三章章八句九章章十句

苑彼桑柔其下侯甸捋采其劉瘼此下民不殄心

憂倉兄填兮倬彼昊天寧不我矜

捋力活反倉音
愴兄音况

苑茂甸徧也桑之爲物其葉最盛及其采之也

一朝而盡無黃落之漸故詩人取以爲譬言周

之盛時如桑柔之茂其蔭無所不徧至于厲王

肆行暴虐以敗其成業而王室忽焉彫弊如桑

之旣采民失其蔭而受其病故君子憂之不絕

於心悲之益久而不已號天而訴之也

四牡騤騤旃旒有翩亂生不夷靡國不泯民靡有
黎具禍以燼於乎有哀國步斯頻

翻叶拊賓反泯叶彌鄰反
燼叶咨辛反哀叶音依

騤騤不息也鳥隼曰旃龜蛇曰旒翩飛動不止
之貌夷平泯滅黎黑也謂黑首也具俱也燼灰
燼也步猶運也頻常也自此至四章皆征役者
之怨詞

國步蔑資天不我將靡所止疑云徂何往君子實
維秉心無競誰生厲階至今爲梗

新叶子兩反疑叶如字競叶其兩反
階叶居奚反

茂滅也滅資卽易云喪其資斧也將養也靡所
止疑者言亂無所止而此心之疑惑不定也故
曰云徂何徃誰生厲階皆疑之之詞也厲階暗
指厲王用小人以釀亂也梗病也

憂心慙慙念我土宇我生不辰逢天俾怒自西徂
東靡所定處多我覲瘠孔棘我圉

俾音盧怒叶暖
五反東叶音十

土宇征役者之家鄉也辰時俾厚也俾怒卽指
禍亂而言自西徂東周都于西繇周而出征于
東也

爲謀爲茲亂况斯削告爾憂恤誨爾序爵誰能執

無逝不以濯其何能淑載胥及溺

茲叶音必溺叶奴學反

茲愼况滋也憂恤者憂不得賢人而任之也序爵辨別賢否之道也胥溺卽滋削之意也賢者之能已亂猶濯之能解熱也今王之所任者其何能善哉則相與入于陷溺而已矣

如彼遡風亦孔之愼民有肅心莽云不逮好是稼

穡力民代食稼穡維寶代食維好

風叶乎音反優音愛莽音烹

遡卿優咍也猶云鳴咍短氣也肅畏莽使也賢人懷疑懼憚于見使祇有盡力稼穡以代祿食

而已言雖勞而無患也

天降喪亂滅我立王降此蠢賊稼穡卒瘁哀恫中

國具贅卒荒靡有旅力以念穹蒼

恫音通
旅作贅

承上章來言力稼以代祿食其如天之降災爲
穡事病何哉哀恫已極贅力已窮計無復之惟
有念彼穹蒼而已

惟此惠君民人所瞻秉心宣猶考慎其相維彼不
順自獨俾臧自有肺腸俾民卒狂

瞻叶側姜反相
去聲叶平聲

惠順也謂順于義理也既持其心又博謀于衆
而考之于其輔相此所以無不順也今則不然

自獨俾臧自謂其賢也自有肺腸自用其心也
欲民之順難矣

瞻彼中林牡牡其鹿朋友已諧不胥以穀人亦有

言進退維谷

牡音莘諧叶
子林反

牡牡衆多並行貌朋僚相諧曾彼鹿之不如也
不信於友無以獲上不獲乎上無以使民洵乎
進退之維谷矣

維此聖人瞻言百里維彼愚人覆狂以喜匪言不
能胡斯畏忌

叶巨
已反

聖通明也瞻言猶云有所見而言也百里極言

其遠也畏忌畏王之暴虐而忌諱其讒人也

維此良人弗求弗迪維彼忍心是顧是復民之貪

亂寧爲荼毒

迪叶徒沃反忍心卽所云忍心害理也

弗迪善人而念卹殘忍此真別具一肺腸也民之狂亂固宜

大風有隧有空大谷維此良人作爲式穀維彼不

順征以中垢

音苟叶居六反

且善人之所爲皆式穀也而不善人之所爲皆中垢也二者相去遠矣大風之起必有自來空大谷者風之所從起也王之不善民之從惡亦

有自來矣

大風有隧貪人敗類聽言則對誦言如醉匪用其

良覆俾我悻

叶蒲
寐反

大風之起能敗物貪人之起能敗類何也貪人
之言聽之則如對誦之則如醉卽讒言之謂也
善良之不見用皆繇此輩反覆害之耳

嗟爾朋友予豈不知而作如彼飛蟲時亦弋獲旣
之陰女反予來赫

獲叶胡郭反陰去聲
赫叶黑各反

朋友指貪人此本以戒王而託之朋友也如彼
飛蟲時亦弋獲言已之言或亦有中猶曰千慮

而一得也

民之困極職涼善皆爲民不利如云不克民之困

通職競用力

皆叶必
墨反

職專涼薄也專事刻核也善皆工爲反覆也克
勝也上之害民惟恐不勝故民日以邪僻繇上
用力而競之也

民之未戾職盜爲寇涼曰不可覆皆善詈雖曰匪

予既作爾歌

詈音利

戾定也民之未定者職上有盜賊之臣爲之寇
也汝苟信以爲不可則又曷爲皆詈我哉此王

心之反覆也予之作歌豈獨爲一己之私實有關於王國也已序云芮伯刺厲王而作

桑柔十六章八章章八句八章章六句

倬彼雲漢昭回于天王曰於乎何辜今之人天降喪亂饑饉薦臻靡神不舉靡愛斯牲圭璧旣卒寧

莫我聽

天叶見上牲叶桑經反

平聲

雲漢天河也昭光回轉也言其光隨天而轉也薦游通重也臻至也靡神不舉所謂國有凶荒則索鬼神而祭之也圭璧禮神之玉卒盡也寧猶何也

旱既大甚蘊隆蟲蟲不殄禋祀自郊徂宮上下莫瘳靡神不宗后稷不克上帝不臨耗斁下土寧丁

我躬

臨叶力中反
斁音妬

蘊蓄隆盛也蟲蟲熱氣也熱氣生蟲如螟螣之類殄絕也不殄禋祀謂以次而舉相續不絕也郊祀天地也宮宗廟也上謂祭天下謂祭地奠獻其物瘞埋其儀也宗尊也上章脩廢祀故曰舉此章脩常祀故曰宗克勝也言后稷欲救此旱災而不能勝也臨享也稷以親言帝以尊言也斁敗丁當也寧丁我躬有歸咎自責之意

旱既大甚則不可推兢兢業業如霆如雷周餘黎
民靡有孑遺昊天上帝則不我遺胡不相畏先祖
于摧

推吐雷反遺叶夷回反
推音崔

推去也兢兢恐也業業危也如霆如雷兢兢業之
狀孑無右臂貌遺餘摧滅也

旱既大甚則不可沮赫赫炎炎云我無所大命近
止靡瞻靡顧群公先正則不我助父母先祖胡寧
忍予

沮上聲顧叶果五反助叶牀所反
予叶演女反

不可沮謂非人力所能遏也赫赫旱氣也炎炎
熱氣也無所無所容也大命近止殆將至也瞻

仰顧望也靡瞻靡顧無所聊賴之詞蕪天與神
而言群公先正月令所謂雩祀百辟卿士之有
益于民者以祈穀實也群公先正與我疎故言
助父母先祖與我親故言忍

旱旣大甚滌滌山川旱魃爲虐如惓如焚我心憚
暑憂心如熏群公先正則不我聞昊天上帝胡俾
我遯

川叶樞倫反焚叶符勾反聞叶微勾反
遯叶徒勾反

滌滌言山無木川無水如滌而除之也魃旱神
也惓憊之也憚勞也畏也熏灼遯逃也宣王若
言所以禱旱者至矣而莫之答故曰苟吾之不

善不當于天心則寧使我遯去以避賢者無以我故苦此庶民也

旱既大甚黽勉畏去胡寧瘖我以旱憯不知其故
祈年孔風方社不莫昊天上帝則不我虞敬恭明
神宜無悔怒

莫音暮虞叶元具反

黽勉畏去又言雖遯而不敢也祈年不風此致旱之繇乎故雖方社而不莫矣

旱既大甚散無友紀鞠哉庶正疚哉冢宰趣馬師氏膳夫左右靡人不周無不能止瞻卬昊天云如

何里

寧叶獎里反趣七口反右叶羽已反卬音仰

友紕猶言綱紀也鞫窮也庶正衆官之長也冢
宰又衆長之長也趣馬掌馬之官師氏掌以兵
守王門者膳夫掌食之官也歲凶年穀不登則
趣馬不秣師氏弛其兵馳道不除祭祀不縣膳
夫徹膳左右布而不脩大夫不食梁士飲酒不
樂周遍也止謂止于其所而禱也里憂也與漢
書無俚之俚同聊賴之意也

瞻卬昊天有嘒其星大夫君子昭假無羸大命近
止無棄爾成何求爲我以戾庶正瞻卬昊天曷惠

其寧

假音格羸音盈
正叶諸盈反

嗟明貌宣王候雨而見星似乎絕望矣復呼諸
臣而語之曰爾之大夫君子天命已昭格而無
遺矣茲則爲近雨之候而汝將有成功也汝勿
自棄其功以至于衆正而後止焉民心獲寧而
庶官定矣天其曷惠之哉有不容絕望又不敢
期必之詞也

序云仍叔美宣王也宣王承厲王之烈內有撥
亂之志遇裁而懼側身脩行欲銷去之天下喜
于王化復行百姓見憂故作是詩

雲漢八章章十句

崧高維嶽駿極于天維嶽降神生甫及申維申及

甫維周之翰四國于蕃四方于宣

翰叶胡干反
蕃叶分連反

山大而高曰崧嶽山之尊號甫甫侯卽穆王時
作呂刑者申申伯也申本侯爵以其爲方伯故
謂之申伯此章重生申併舉甫侯者以其先俱
出四嶽且俱姜姓見其與古人齊美之意也維
周之翰于蕃于宣紀其有功于王室也此分封
之所繇起

疊疊申伯王纘之事于邑于謝南國是式王命召

伯定申伯之宅登是南邦世執其功

式叶失吏反
伯叶連莫反

宅叶達各反
邦叶卜工反

亶亶勤勉之意王宣王纘繼也事總領諸侯之事邑國都也南國謝邑在周之南土也式法也申伯足爲南國諸侯之法也召伯召穆公虎也當時召伯爲司空故命之營謝重其事也定經營之也登成也功統領四嶽之功也

王命申伯式是南邦因是謝人以作爾庸王命召伯徹申伯土田王命傅御遷其私人

田叶地因反

庸城也作墉所以建國也徹定其疆界正其賦稅也傅御申伯家臣之長也私人家人也遷使

就國也此與上章皆述王命分封之意

申伯之功召伯是營有俶其城寢廟既成既成藐藐王錫申伯四牡蹻蹻鉤膺濯濯

俶音蓄

功營謝之功也俶始作也藐藐深貌蹻蹻壯貌濯濯光明也王侯營室以宗廟爲先故曰寢廟既成

王遣申伯路車乘馬我圖爾居莫如南土錫爾介圭以作爾寶往近王舅南土是保

馬叶蒲福反寶保俱叶音補

路車乘馬以贈行也錫爾介圭以昭信也介圭諸侯之封圭近卽遠也言豈欲舅氏相達直欲

南土是保故耳

申伯信邁王餞于鄒申伯還南謝于誠歸王命召伯徹申伯土疆以峙其粳式邁其行

叶戶郎反

鄒在鎬京之西岐周之東時王省岐周申伯往辭故王餞之于鄒誠歸對謝邑而言還南者旣辭又南還于鎬然後適謝也徹土疆與上章不同此乃取其井田什一之賦以爲餼糧當召伯營謝時已爲之積非餞行後王始命之也

申伯番番旣入于謝徒御嘽嘽周邦咸喜戎有良翰不顯申伯王之元舅文武是憲

番音波翰叶見上憲叶虛言反

番番武勇貌。嘽嘽衆盛也。入謝者自此而入彼也。周邦京師也。戎汝也。周人自相謂也。元長憲法也。王之元舅以親而言。文武是憲以望而言也。所以謂之良翰。

申伯之德柔惠且直。揉此萬邦。聞于四國。吉甫作誦。其詩孔碩。其風肆好。以贈申伯。

揉汝又反。聞音問。國叶于通反。

揉治也。吉甫尹吉甫周之卿士也。以詩而歌于工爲誦。誦之詞則爲詩。以賦諸篇。什而言詩之聲則爲風。以形諸詠歌。足以感人而言孔碩。謂鋪張揚厲之大肆。遂也。肆好謂意味聲氣之美。

皆本申伯德業之所自致非誇吉甫之能詩也
傳云宣王之舅申伯出封于謝尹吉甫作是詩
以送之序云吉甫美宣王也

崧高八章章八句

天生烝民有物有則民之秉彝好是懿德天監有
周昭假于下保茲天子生仲山甫

假音格下叶後
五反

秉彝好德此物則之常也宣王之于仲山甫也
可謂好之矣然而夫實昭示我周而生之非偶
然也仲山甫樊侯之字也

仲山甫之德柔嘉維則令儀令色小心翼翼古訓

是式威儀是力天子是若明命使賦

此言仲山甫之德之美有可好之道也桑嘉令儀小心法古此山甫之懿德也雖天子順而若之實亦天之明命俾作賦于王家也賦者以其德而輸之于王也亦卽下文賦政之賦

王命仲山甫式是百辟纘戎祖考王躬是保出納王命王之喉舌賦政于外四方爰發

辟音璧發叶方月反

上言仲山甫之德此則備舉其職也式百辟冢宰之官保王躬太保之任也仲山甫蓋以冢宰而兼太保之職而太保則其世官也出承而布

之也納行而復之也喉舌所以出言也發發而應之也

肅肅王命仲山甫將之邦國若否仲山甫明之既明且哲以保其身夙夜匪解以事一人

否音卹明叶謨卽反

奉行王命卽上文之出納喉舌也邦國若否卽四方之爰發也此章重在明哲上必明且哲始能保身能保其身始能保王之躬所謂夙夜匪懈以事一人者矣

人亦有言柔則茹之剛則吐之維仲山甫柔亦不茹剛亦不吐不侮矜寡不畏疆禦

茹音汝矜音奇禦音叶果五反

柔茹剛吐世俗之言也亦人情所不免也不茹不吐則爲德性之美有以異於人矣鰥寡不侮疆禦不畏亦以見其不茹不吐之實也

人亦有言德輶如毛民鮮克舉之我儀圖之維仲山甫舉之愛莫助之衮職有闕維仲山甫補之

圖叶丁五反
助叶牀五反

德至輕而莫能舉所謂中庸不可能也愛莫助之爲仁由已而由人乎哉衮職王職也天子龍衮不敢斥言王闕故曰衮職有闕也補之謂啓沃君心彌縫匡救其失也

仲山甫出祖四牡業業征夫捷捷每懷靡及四牡
彭彭八鸞鏘鏘王命仲山甫城彼東方

及叶極業反
彭叶鋪郎反

祖行祭也業業健貌捷捷疾貌東方齊也傳曰
古者諸侯之居逼隘則王者遷其邑而定其居
蓋去薄姑而遷于臨菑也史記齊獻公元年時
事計獻公當夷王之時與此傳不合豈徙于夷
王時至是而始備其城郭之守與
四牡駉駉八鸞嘒嘒仲山甫徂齊式遄其歸吉甫
作誦穆如清風仲山甫永懷以慰其心

嗑叶居奚反
風叶乎惜反

駢駢敏也嗑嗑和也式過其歸屬望其亟歸以
保王躬補王闕不可久居于外也穆深長也清
風喻其詩之適鬯足以入人也永懷以慰作詩
者之心則過歸有日矣永懷時在念也

傳云宣王命樊侯仲山甫築城于齊而尹吉甫
作詩以送之序云吉甫美宣王也

烝民八章章八句

奕奕梁山維禹甸之有倬其道韓侯受命王親命
之纘戎祖考無廢朕命夙夜匪解虔共爾位朕命

言系二第 卷十一
不易榦不庭方以佐戎辟

解音懈 叶訖力反 辟音壁

叶訖力反

奕奕大貌梁山韓之鎮也在陝西韓城縣旬治也倬明貌韓國名侯爵武王之後也受命蓋卽位除喪以士服入見天子而聽命也韓侯受命之後虔共爾位必令不庭之方悉奉聲教以佐戎辟威嚴之治焉韓與追貊二國相隣故耳

四牡奕奕孔脩且張韓侯入覲以其介圭入覲于王王錫韓侯淑旂綏章簞茀錯衡玄衮赤舄鉤膺

鏤錫

羊

鞞鞞

鞞

淺轡

鞞革

金厄

衡叶戶卽反 鞞音覓

厄叶於栗反

鞞音空

脩長張大也介圭封圭執之爲贄以合瑞于王

者淑美也交龍曰旂綏章染鳥羽或旄牛尾爲之注于旂干之首爲表章者也鏤刻金也馬眉上飾曰錫今名當盧盧額也盧在睂眼之上韉去毛之革也鞬式中也謂兩較之間橫木可憑者以韉持之使牢固也淺虎皮也謂虎皮之淺毛者幘覆式也字一作幣一作鞬以有毛之皮覆式上也條革轡首也金厄以金爲環纏搯轡首此章言其所錫之多以見恩寵之厚也總是車馬衣服上以賜下者

韓侯出祖出宿于屠顯父餞之清酒百壺其殽維

何魚鼈鮮魚其蔌維何維筍及蒲其贈維何乘馬
路車邊豆有且侯氏燕胥

祖行祭也始行爲祖祭者爲尊其所往也韓侯
旣覲而反國必祖者尊其所往去則如始行焉
屠地名顯父周之卿士奉王命而餞之也蔌菜
穀也筍竹萌也蒲蒲蒻也且多貌胥相飲也此
章言已覲而返下章言遂以親迎也

韓侯取妻汾王之甥蹶父之子韓侯迎止于蹶之
里百兩彭彭八鸞鏘鏘不顯其光諸娣從之祁祁
如雲韓侯顧之爛其盈門

取迎俱去聲汾音芬蹶音
蛄父音甫子叶獎里

反兩音亮又如字彭叶鋪卽反
婢青弟門叶督貧反

汾王厲王也厲王流于彘在汾水之上故時人
以目王焉蹶父周之卿士姑姓厲王之壻也諸
娣諸侯一娶九女二國媵之皆有娣姪也祁祁
徐靜也如雲衆多也

蹶父孔武靡國不到爲韓姑相攸莫如韓樂孔樂
韓土川澤訐訐魴鱖甫甫鹿麋嘯嘯有熊有羆有
貓有虎慶旣令居韓姑燕譽

爲相俱去聲樂叶力告反訐音許嘆音語

貓茅苗二音居叶斤御斤於二反
齊叶羊如羊諸二反

韓姑蹶父之子韓侯妻也勅蹶父以王事行于

四方爲其女擇可嫁之所莫如韓土之善也川澤之大方物之備皆其善處善則可樂而豫也詩中譽字皆作豫

溥彼韓城燕師所完以先祖受命因時百蠻王錫韓侯其追其貊奄受北國因以其伯實墉實壑實畝實籍獻其貔皮赤豹黃羆

燕平聲

燕召公之國師衆也韓初封時召公爲司空王命以其衆爲築此城如召伯營謝山甫城齊之類追貊百蠻中夷狄之地卽北國也墉城堅池籍稅也貔羆獸名韓侯爲伯命諸侯各脩城池

治田畝正稅法以時貢其所有于王也

傳云韓侯初立來朝始受王命而歸詩人作此以送之序云韓奕尹吉甫美宣王能錫命諸侯也

韓奕六章章十二句

江漢浮浮武夫滔滔匪安匪遊淮夷來求既出我車既設我旟匪安匪舒淮夷來鋪

滔叶他候反

徐州有夷在淮北楊州有夷在淮南而江漢正入淮所繇之路故首以江漢爲言浮浮水盛貌滔滔水順流貌匪安匪遊乃將卒競勸之心以

求負固之敵也鋪陳也陳師以行天討也

江漢湯湯武夫洸洸經營四方告成于王四方既

平王國庶定時靡有爭王心載寧

湯音傷洸音光定叶唐丁反爭

叶苗
反

洸洸武貌經營如來求來鋪謀以服其心屈其

力也四方卽淮夷也告成以露布告成功于王

也

江漢之許王命召虎式辟四方徹我疆土匪疚匪

棘王國來極于疆于理至于南海

許音虎辟音闢海叶虎委反

虎召穆公名徹井其田也疚病棘急也極中之

表也居中而爲四方所取正也

王命召虎來旬來宣文武受命召公維翰無曰予

小子召公是似肇敏戎功用錫爾祉

翰子叶見上似叶養里反

此章述王命也南方旣平王命召公來歸于周以徧治四方而布行其政曰昔文武受命維召康公實爲之翰汝實肖先公之德開敏於戎事我是用錫汝以祉福也

釐爾圭瓚秬鬯一卣告于文人錫山土田于周受

命自召祖命虎拜稽首天子萬年

瓚才旱反卣音酉田叶地因反

命叶滿奔反
年叶彌因反

釐賜卣尊也文人先祖之有文德者指文王也
周岐周也召祖穆公之祖康公也此序王賜召
公策命之詞

虎拜稽首對揚王休作召公考天子萬壽明明天
子令聞不已矢其文德洽此四國

休叶虛久反考叶去久反壽叶殖酉反
于國俱叶見上聞音問

上章稽首受命岐周此章稽首拜康公廟正用
圭瓚以祀先之時也對者不敢墜成命揚者不
敢匿君休也考成也事功有蹟可稽謂之成天
子萬壽者勒之鼎彝之詞王命召公用召祖命

故虎之答王亦爲召康公所以對成王受命之辭自天子萬壽以下召康公之遺意也

序云尹吉甫美宣王能興衰撥亂召穆公平淮夷而作是詩

江漢六章章八句

赫赫明明王命卿士南仲大祖大師皇父整我六師以脩我戎既敬既戒惠此南國

士叶音所戎叶音汝戒訖力反

赫赫明明王命也卿士卽皇父之官也南仲見出車篇太祖始祖也稱其世功以見軍略之素閑也太師皇父之燕官叙其位望以見威名之

素著也六師天子之軍南國淮南諸國受徐夷之侵者

王謂尹氏命程伯休父左右陳行戒我師旅率彼淮浦省此徐土不留不處三事就緒

行音杭

此言策命六卿之事尹氏吉甫也蓋爲內史掌策命卿大夫也程伯休父周大夫陳行謂結陣而行也淮浦徐州聯屬之地故循而省之留謂宿師而老處遷延也三事三農之事上農中農下農也師之所處荆棘生焉故必不留不處而後三事得以就緒也

赫赫業業有嚴天子王舒保作匪紹匪遊徐方繹

騷震驚徐方如雷如霆徐方震驚

葉叶且却反
騷叶蘇侯反

王之親征也人望其赫赫業業之威而畏之曰
有嚴哉天子也然王則舒徐安行不急不緩而
徐方之人莫不震動如雷霆作於其上不遑寧
處矣

王奮厥武如震如怒進厥虎臣闕如虢虎鋪敦淮
濱仍執醜虜截彼淮浦王師之所

怒叶暖五反闕
音喊虢音呼

師行至于淮上則遂布其師旅敦集其陳以待
之既戰則醜虜自獲不戒而多天威所臨截然

其不可犯者矣截斬截也

王旅嘽嘽如飛如翰如江如漢如山之苞如川之

流縣縣翼翼不測不克濯征徐國

苞叶鋪鉤反
國叶越逼反

此言征伐時事嘽嘽衆盛貌如飛如翰疾也如
江如漢衆也如山不可動也如川不可禦也縣
縣不可絕也不測不可知也不克不可勝也濯
大也

王猶允塞徐方既來徐方既同天子之功四方既

平徐方來庭徐方不回王曰還歸

來叶六直反
歸叶古回反

允塞者夸詡之反也王之心允信而無僞妄塞

實而非虛文故不待戰而徐方自服其背叛者
來歸渙散者來同皆王道所致信惟天子之功
也徐旣心服而不回則振旅遄歸亦不俟終日
矣此宣王所以致中興之盛治者歟按此卽小
雅鼓鐘淮上而作淮人感宣王之德而思之也
固宜且懷允與允塞二字亦相照應

常武六章章八句

瞻卬昊天則不我惠孔填不寧降此大厲邦靡有
定士民其瘵瘵音債蠹賊蠹疾靡有夷届罪罟不收靡有

夷瘵

瘵音債叶側例反蠹音牟届叶居氣反

此亦承上篇來療病也。蝨賊解見上。蓋國有所定則民受其福。國無所定則受其病。於是蝨賊無已時而罪咎不勝收也。此所以日淪于凋療之病也。

人有土田女反有之。人有民人女覆奪之。此宜無罪。女反收之。彼宜有罪。女覆說脫之。有西錄二音收補國反

土田四句述其侵凌奪取者。反覆之無常無罪。四句述其拘繫縱釋者。反覆之不當也。

哲夫成城。哲婦傾城。懿厥哲婦。爲梟爲鴟。婦有長舌。維厲之階。亂靡降自天。生自婦人。匪教匪誨。時

維婦寺

附叶居奚反天叶鑣因反
誨叶呼位反

哲夫謀國之臣也哲婦指褒姒也城衛邦者一
成一傾判然矣梟鳴喻其惡長舌罵其狀此婦
人者天既生之而召亂婦寺復誨之而滋紆國
如何而不傾覆哉

鞠人忮忒譖始竟背豈曰不極伊胡爲慝如賈三
倍君子是識婦無公事休其蠶織

背叶必墨反
賈音古

鞠者推勘窮究之意欲勘其終必原其始豈曰
不極言其惡之極也如賈之三倍獲利如此之
多孰此術以程君子焉其可乎孰知君子不顧

望乎此也婦人無事蠶織其事也蠶織之不事
而干預國政何哉婦人于政則君子之寤可知
天何以刺何神不富舍爾介狄維予胥忌不弔不
祥威儀不類人之云亡邦國瘁

刺音砌富叶
方味反

刺責也言欲責之于天則何神不媚而天難問
矣以彼之害甚于狄人故曰介狄而予之所深
忌也不祥之物而不弔之喪其威儀不類甚矣
想亦必與幽王為沉湎而善類之日亡不覺邦
國之殄瘁不知也

天之降罔維其優矣人之云亡心之憂矣天之降

罔維其幾矣人之云亡心之悲矣

此卽天作孽猶可逭自作孽不可活之意言天之降罔猶可幾也人之云亡憂無日矣

威沸檻泉維其深矣心之憂矣寧自今矣不自我先不自我後藐藐昊天無不克鞏無忝皇祖式救爾後

藏有必沸自非檻胡覽反

鞏音古

威沸泉湧貌檻泉泉正出者藐藐高遠貌鞏固也夫泉之湧也其源深矣幽王之敗其所從來者亦久矣非今日而然也故君子懼而相戒曰天之藐然遠而難信也無不自知敕戒以求鞏

固庶幾上不忝祖宗下不危孫子云爾王可不
亟蒞之乎序云凡伯刺幽王也

瞻卬七章三章章十句四章章八句

旻天疾威天篤降喪瘠我饑饉民卒流亡我居圉

卒荒

瘠去聲叶喪卽反
瘠音顛

瘠病也繇饑饉喪亂故病居中國圉邊陲也中
外皆荒饑饉之禍無可逃者矣

天降罪罟蟲賊內訌昏椽靡共潰潰回遘實靖夷

我邦

兵音恭 邦叶
上工反

靖夷是好字亂邦而曰靖夷猶治臣而曰亂臣

也潰潰回邪者其能靖夷我邦乎其如蟲賊訏
昏桮供者何蟲賊害苗之蟲此饑饉之兆也昏
桮之人民日流亡而不知矣

皐皐訛訛曾不知其玷兢兢業業孔填不寧我位
孔貶

皐訛者留兢業者去所以目底于喪亂也

如彼歲旱草不潰茂如彼棲苴我相此邦無不潰
止

潰茂草之遂茂也旱則不能矣棲苴水中浮草
棲于水上者潰止則不能矣以喻水旱無一而

可皆足以荐饑也

維昔之富不如時維今之疾不如茲彼疏斯稗胡不自替職兄况斯引

疏麤也稗精也君子之與小人精麤不同可指而知也爲小人者曷不自替以避君子而乃自任以長此亂耶

池之竭矣不云自頰泉之竭矣不云自中溥斯害矣職兄况斯弘不裁我躬中叶諸仍反躬叶姑弘反

池水之鍾也泉水之發也故池之竭由外之不入泉之竭繇內之不出今內則諸侯不親外則

國人不附其害徧矣然小人猶自任以益大此
亂惟曰不裁我躬曾不顧其害民以及於國也
昔先王受命有如召公曰辟國百里今也今感國
百里於乎哀哉維今之人不尚有舊辟音闢舊叶
巨已反
先王文武也召公康公也百里百里之國也日
闕日感是何今昔之懸殊哉柰今之人不尚有
舊而日見其境土之蹙耳比諸召公不大有媿
色乎

傳云此刺幽王任用小人以致饑饉侵削之詩
也

召旻七章四章章五句三章章七句
詩經大雅卷之二十一終

詩經剖疑卷之二十二

周頌

頌者宗廟之樂歌序謂美盛德之形容以其成功告於神明者也頌與容古字通用故序以此言之按頌而曰容猶廟而曰貌耳孔鄭二儒云頌之言容歌成功之容狀也廟之言貌以死者不可得見故立宮室象貌之也周頌三十一篇多周公所定而亦有康王以後之詩

於穆清廟肅雝顯相濟濟多士秉文之德對越在

天駿奔走在廟不顯不承無數於人斯

序曰清廟祀文王也周公既成洛邑而朝諸侯因率以祀文王焉書大傳曰周公升歌清廟若在廟中嘗見文王者事神尚索故曰清廟也然文王之德何以見之卽其當日助祭之公侯咸敬且和及其執事之人又無非文德所造就而持循者夫此多士既對越其在天之神而又駿奔走其在廟之主如此則是文王之德豈不顯乎豈不承乎信乎其無有厭數於人矣其言也文王之德不可見而見于助祭之人其終也因

助祭之人和且敬而知文德之不忘以此而見
上下隱微之無間也作詩者形容盛德至此極
矣不顯顯也指隱微言不承承也指上下言
清廟一章八句

維天之命於穆不已於乎不顯文王之德之純
假以溢我我其收之駿惠我文王曾孫篤之

假格通

此似祭成王之詩蓋言天命於穆而不已似乎
幽遠而莫測矣文王之德純一不雜與天無間
又何其純也不顯卽於穆純卽不已文王其善
法天者乎假至溢過收受駿大惠予也文德之

純禋福無涯不于其身而于其子孫成王之嗣
爲康王矣曾孫康王自謂也蓋文王之福不自
享獨貽其子孫成王又不享文王之福而貽之
于康王其與天之生物不息者奚以異哉文王
之大惠而曰駿惠我文王此經傳倒文法也

維天之命一章八句

維清緝熙文王之典肇禋迄用有成維周之禎
序云大祀文王之樂章也華谷嚴氏曰清則潔
靜而不雜緝則悠久而不已熙則廣大而光明
而以典言之者謂其德寓於法也文王有典以

貽後人故自始祀至今日而有成焉是文王之
典則爲周之禎祥也夫以祀爲成與夸詡成功
者異矣以典爲祥與符瑞不經者異矣非大祀
文王烏能有此

維清一章五句

烈文辟公錫茲祉福惠我無疆子孫保之

無封靡于爾邦維王其崇之念茲武功繼序其皇
之

無競維人四方其訓之不顯維德百辟其刑之於
手前王不忘

烈光也辟公諸侯也此祀武王而獻助祭者之
樂歌言諸侯助祭盡其誠敬宗廟享之俾我獲
福則是祉福非他人之貽乃諸侯錫之也又不
寧今日且惠我以無疆使我子孫保之矣封
封殖靡汰侈封者必靡亦相因也戎皇皆大貌
言汝能制節謹度無封殖侈靡于汝邦則土當
尊崇汝又念汝有此錫福之大功務使汝之子
孫繼序而益昌大之也無競言其烈不顯言
其德蓋武王之功德可爲訓于四方儀刑于百
辟此前王之所以不可護兮也而爲其子孫者

可不知勉哉初勉助祭之人而終以自勉也如此

烈文一章十三句

天作高山大王荒之彼作矣文王康之彼徂矣岐有夷之行子孫保之

高山謂岐山荒治也夷通作彛行道也此祭太王之詩言天作岐山而太王始治之大王既作而文王又安之今既遷宗周則岐山之事若往而不可追矣然先王有彛常之道爲衆所歸心者子孫當世世保守而勿失也蓋克遵其道則

文之遷豐武之遷鎬與太王之遷岐其實一也
其始作之固係乎天其終保之則係乎人也

天作一章七句

昊天有成命二后受之成王不敢康夙夜基命宥
密於緝熙單厥心肆其靖之

二后文武也不敢康者天命靡常也夙夜基命
緝熙宥密正不敢康之實也成王可謂盡厥心
矣心之盡者心之安也初不敢康者而既乃靖
也心之安而命永固矣其享祀于無窮也允宜
昊天有成命一章七句

我將我享維羊維牛維天其右之

右即下文右享之謂

儀式刑文王之典日靖四方伊嘏文王既右享之
○我其夙夜畏天之威于時保之

將奉享獻右祐也舊說祀文王于明堂以配上
帝之樂歌言禋祀之時主祭者奉其牛羊以享
上帝而曰天庶其陟降而福祐我乎蓋不敢必
也言我儀式思法文王之典以靖安天下則我
祖文王亦將以天之祐而祐乎我矣然天命難
諶天威難犯我之夙夜可不畏乎倘肆而無忌
則天之祐我者必當降罰于我而我之福將不

能保矣此言畏天法祖無二理也 程子曰萬

物本乎天人本乎祖故冬至祭天而以祖配之

以冬至氣之始也萬物成形於帝而人成形於

父故季秋享帝而以父配之以季秋成物之

時也

按此俱在祖廟之祭祀但右只本字解不必為
福祐也凡進食之禮左殺右載飯左羹右言其
便于飲食也故曰
既右享之

我將一章十句

時邁其邦昊天其子之

實右序有周薄言震之莫不震疊懷柔百神及河

喬嶽允王維后

右亦如字訓作優字
古人重右故也

明昭有周式序在位載戢干戈載櫜弓矢我求懿

德肆于時夏允王保之

邦諸侯之國昊天其子卽天子也天能生物不能養萬物必命一人焉而作之君作之師以養乎物是卽天之子也周旣為天之子則天其祐之矣河嶽百神之長時夏中國也周制十有二年王巡狩于列國柴望祭告諸侯畢朝此卽巡狩而朝會祭告之樂歌其曰震者不敢卽安之意震疊者有慶賞刑威之事也邦國諸侯而知制節謹度以保其爵土卽君后保之也戢橐弓矢與求懿德是一時事求懿德是行慶賞也戢

兮矢是薄刑威也二者所以保邦國之實也

時邁一章十五句

執競武王無競維烈不顯成康上帝是皇

自彼成康奄有四方斤斤其明

斤去聲

鐘鼓喤喤磬筦將將降福穰穰

降福簡簡威儀反反既醉既飽福祿來反

斤斤明察貌喤喤和也將將集也穰穰多也簡

簡大也反反謹重貌來反申重貌此合祭武王

成康之詩或者祀成康而以武王先之也言武

王持其自強不息之心以運于政理故其功烈

之盛天下莫與之競而為之繼者且多賢聖其
播聞豈不顯哉我成王康王之德亦上帝之所
深美也且成康之時服叛懷寧幅員愈廣而照
臨四方無所不察昭邇及遠有武王之風焉故
我後王得以備禮奏樂成享而受福也然受福
雖多而愈懷謹重是以既醉既飽而福祿之來
反覆而申重之禮行而神益福之未有艾也註
云此昭王以後之詩或有謂成康卽指武王殊
不然

執競二章十四句

思文后稷克配彼天立我烝民莫匪爾極貽我來
牟帝命率育無此疆爾界陳常于時夏

此祭后稷之詩言其文德克配于天可謂至矣
天生衆民而欲養之稷之使我烝民得以粒食
者正莫非其德之配天也德不盛則五穀嘉種
何自而降乃其貽我民以來與牟者乎來小麥
牟大麥也言此二麥實上帝之命以此徧養下
民者是以無有遠近彼此之殊而得以叙其君
臣父子之常道于中國也非養而教亦莫之能
遂矣

思文一章八句

嗟嗟臣工敬爾在公王釐爾成來咨來茹

嗟嗟保介維莫之春亦又何求如何新畬於皇來
牟將受厥明明昭上帝迄用康年命我衆人痔乃

錢鑄奄觀銍艾

錢音剪鑄音傳
銍音至

釐賜茹度也保介農官之副畬三歲田也衆人
甸徒也痔具錢鉋鑄鉏皆田器銍穫禾短鎌艾
穫也惟能痔乃錢鑄乃克有銍艾之望也此戒
農官之詩先言王有成法以賜汝如授時省耕
之類汝尙來咨度之而罔愆也次言所戒之事

夫三月則當治其新畬矣今何如哉然麥已將熟則可以受上帝之明賜而猶未已焉蓋此明昭之上帝又將賜我以新畬而成豐年也於是率甸徒具田器以治乎新畬而庶幾哉有秋可望乎蓋治其事於前乃收其功於後不可以不勉也想必來年二種向時未有而今始得之故皆曰帝命率育又曰上帝之明賜也二麥以補五穀之不逮民間青黃不接時最為得力此所以容度之於農工而拜受乎玄貺也

臣工一章十五句

噫嘻成王既昭假爾率時農夫播厥百穀駿發爾
私終三十里亦服爾耕十千維耦

昭明假格發耕也私私田也三十里萬夫之地
四旁有川內方三十里有奇言三十者舉成數
也耦二人並耕也序云此祈穀之詞言成王既
昭格爾衆庶而在天之靈若面命之當率是農
夫播其百穀使之大發其私田以服穡事庶萬
人為耦而俶力于南畝也蓋耕本以二人為耦
今合一川之衆為言故云萬人畢出并力齊心
如合一耦矣此必鄉遂之官司稼之屬其職以

萬夫為界者溝洫用貢法無公田故皆謂之私也通力合作計畝均分大率十而賦其一

噫嘻一章八句

振鷺于飛于彼西雝我客戾止亦有斯容

在彼無惡在此無斁庶幾夙夜以永終譽

惡去聲
斁音妒

振群飛貌雝澤也客謂二王之後夏杞商宋於

周為客即所謂虞賓在位作賓王家者彼此即

賓主二國夙夜言自早至夜無止息之期也詩

言鷺飛于西雝之水何秩秩然而我客來助祭

者其容貌整肅亦如斯鳥之潔白也然非但其

容而已而德之純一乃為相稱在彼無惡之者
在此無厭之者遠近咸宜如是則庶幾其能夙
夜以永終此譽矣雖贊之而亦勉之之詞 愚
按西雖太學辟雍之地是也二王之後助祭于
辟雍質文互考于禮為宜若祭宗廟則惟諸侯
及多士而已無借光於客以自鳴其盛之理

振鷺一章八句

豐年多黍多稌亦有高廩萬億及秭為酒為醴丞

畀祖妣以洽百禮降福孔皆

稌音杜秭音姊
皆叶舉里反

稌稻也黍宜高燥而寒稌宜下濕而暑黍稌皆

熟百穀無不熟矣數萬至萬曰億數億至億曰
秭烝進畀予洽備皆徧也言此豐歲衆穀収入
之多可為酒醴以羞祖妣百禮咸備而神降之
福將亦甚徧矣禮備則福亦備也冬祭曰烝百
物収成可以進矣舉黍稷而衆物在其中舉祖
妣而宗親在其中也 載芟之篇萬億及秭為
酒為醴烝畀祖妣以洽百禮可為一證

豐年一章七句

有瞽有瞽在周之庭

設業設虞崇牙樹羽應田縣鼓執磬祝圉既備乃

奏簫管備舉

虞音巨縣音玄鞞音桃
祝音祝奏叶音祖

嗶嗶厥聲肅雝和鳴先祖是聽我客戾止永觀厥成

瞽樂官庭作樂之處也我客二王之後也成樂
闕也業廣崇牙見靈臺篇樹羽置五采之羽于
崇牙之上也應小鞀田大鼓縣鼓周制鼓也鞀
如鼓而小有柄兩耳持其柄而搖之則旁耳還
自擊磬石磬也祝狀如漆桶以木爲之令左右
擊以起樂者也圉亦作敵狀如伏虎背上有二
十七鉏鋸刻以木長尺攔之以止樂者也簫編

小竹管爲之管如簫併兩而吹之備舉言其盛也王者功成作樂而始合奏之於祖嗶嗶乎其大也肅雝乎其和也先祖聽之樂已大成矣而二王之後作賓于周者亦來觀之蓋以夏商爲典刑樂容雖盛而忠質之意猶存云爾問前篇既以祭祖無借客之儀而此曰我客戾止何也蓋此以樂言非以祭言也祭雖必用樂而樂亦有非祭者况先祖二字未必非指二王言也

有瞽一章十三句

倚與漆沮潛有多魚有鱣有魴鰈鰈鰈鰈以享以

祀以介景福

沮十余反鰈音禮鰈叶于勒反
鰈音條鰈音常祀叶織逆反

漆沮岐周二水名潛慘也蓋積柴養魚使得隱
藏避寒因以薄圍取之也或作潛藏之潛義亦
相通鰈魴鰈鰈鰈皆魚名月令季冬命漁師
始漁天子親往乃嘗魚先薦寢廟季春薦鮓此
其樂歌也 廬陵彭氏曰子孫之祭其先祖九
州之美味莫不咸備然其樂歌必言其所興之
地取其所產之物而薦之者以示不忘本抑亦
思其所嗜之意與

潛一章六句

有來雝雝至止肅肅相維辟公天子穆穆
於薦廣牡相予肆祀假哉皇考綏予孝子
宣哲維人文武維后燕及皇天克昌厥後
綏我眉壽介以繁祉既右烈考亦右文母

雝肅解見前辟公助祭之諸侯也穆穆深遠貌
廣牡大牲肆陳也皇考烈考皆指文王文母太
妣也此武王祭文王之詩蓋徹樂所歌者論語
以雍徹是也言諸侯之來皆和且敬以助我之
祭祀而天子臨祭有穆穆之容焉孝子樂官代

武王自稱也言此諸侯殷薦大牲以助我之祭祀而至哉文考庶其享之以安我爲子盡孝之心乎且考惟宣哲知人之鑒彰惟文武爲君之德備合斯二者故能悅我皇天之心而克昌其後嗣以咸底於寧也惟安故能久而綏之眉壽惟安卽爲福而介之多祉庶幾我獲尊享乎考妣云爾燕卽享也有喜悅之意按周人以諱事神文王名昌而此詩曰克昌厥後何也曰周之所謂諱不以其名號之耳如稱文王則不敢斥之曰文王昌是也然未嘗併諱其文諱其名

而廢其夫者周禮之末失之也

雝一章十六句

載見辟王曰求厥章龍旂陽陽和鈴央央雝雝有

鵠休有烈光

雝音條
鵠音槍

率見昭考以孝以享

以介眉壽永言保之思皇多祐烈文辟公綏以多

福俾緝熙于純嘏

祐音戶
嘏音古

載則也發語詞章法度也交龍曰旂陽明也載

前曰和旂上曰鈴雝雝轡首也央央有鵠皆聲

和也此諸侯助祭於武王廟之詩先言其來朝

稟受法度而其車服之盛如此次言王率諸侯以祭武王昭考武王也廟制太祖居中左昭右穆周廟文王當穆武王當昭故書稱穆考文王而此詩及訪落皆謂武王爲昭考蓋以左右爲昭穆不以昭穆爲尊卑也未言子孫盡孝享之道以介眉壽而受多福是皆諸侯助祭誠恪有以致之使我得繼而明之以至於純嘏也蓋歸德于諸侯之詞猶烈文之意也在天子則因其助祭而歸德之在諸侯則曰來見天子稟承法度于我國家而已

載見一章十四句

有客有客亦白其馬有萋有且敦琢其旅

敦音堆

有客宿宿有客信信言受之繫以繫其馬

叶滿補反

薄言追之左右綏之既有福威降福孔夷

客微子也周既滅商封微子于宋以祀其先王

而以客禮待之不敢臣也殷尚白脩其禮物仍

殷之舊也萋且敬慎貌敦琢選擇也旅其卿大

夫從行者此微子來朝卽去之詩首章言其始

至也一宿曰宿再宿曰信繫其馬愛之不欲其

去也次章言其將去也追之已去而復還之愛

之無已也左右綏之言所以安而留之者無方也
也淫大也威等威也微子統承先王用天子禮樂
所謂淫威也夷常也言其受福之孔常也末章蓋
所以祝之也既有淫威不可不盡其常常卽福也
夷又訓平字平爲福也

有客一章十二句

於皇武王無競維烈允文文王克開厥後嗣武受
之勝殷遏劉耆定爾功

於歎詞皇大遏止劉殺耆致也周公象武王之
功爲大武之樂言武王無競之烈實文王開之

言系月公 卷十二
而武王嗣而受之故能勝殷止殺以致定其功
勛也武王不以武爲武而以止殺底定爲武則
武烈之中實有文德寓焉乃所謂大武也春秋
傳以此爲大武之首章

武一章七句

閔予小子遭家不造嬛嬛在疚於乎皇考永世克

孝

嬛音贊考叶祛候反
孝叶呼候反

念茲皇祖陟降庭止維予小子夙夜敬止

於乎皇王繼序思不忘

成王免喪始朝於先王之廟而作此詩閔病也

遭家不造猶云門祚涼薄嫗與箕同無所依怙
之意疚哀病亦居喪之稱時成王去喪未甚遠
也皇考武王皇祖文王皇王蕪指文武言武王
之孝思念文王常若見其陟降於庭不能忘也
而我之所以夙夜敬止者思欲繼此常序而不
忘耳蓋武王能以念茲皇祖爲孝則成王亦當
以思繼祖考爲孝也頌稱夷典常序皆謂日用
常行不可移易之道也

閔予一章十一句

訪予落止率時昭考於乎悠哉朕未有艾將予就

之繼猶判渙維予小子未堪家多難紹庭上下陟降厥家休矣皇考以保明其身

訪問落始也凡宮室始成則落之故以落爲始
艾及也成王旣朝于廟因作此詩以道延訪群
臣之意言將謀之於始以循我昭考武王之道
然而其道遠矣予不能及也將使予勉強以就
之而所以繼之者猶恐其判渙而不合也則亦
繼其上下于庭陟降于家者庶幾賴皇考之休
有以安顯吾身而已 蘇氏曰此篇蓋承上篇
繼序不忘來謂謀所以繼之之實也訪落盡下

情也率時昭考守家法也於乎悠哉四句卽瞻
之在前忽然在後之意上下紹庭陟降于家卽
武王念文王而陟降庭止者也

訪落一章十二句

敬之敬之天維顯思命不易哉無曰高高在上陟

降厥士日監在茲

思叶新夷反易去聲
哉叶獎黎反

維予小子不聰敬止日就月將學有緝熙于光明

佛時仔肩示我顯德行

佛音弼
行去聲

士事佛弼也仔孳肩任也成王受群臣之戒而
述其言曰敬之哉敬之哉天道甚明其命不易

保也無謂其高不吾察當知天聰明明畏常若
陟降于吾之所爲而無日不監臨于此者烏可
以不敬也繼乃自爲荅之之詞曰我固不聰而
但知敬之是勉矣嘗願學焉庶幾日有所就月
有所進續而明之以至于光明又賴群臣輔助
我以擔荷之任而示我以顯明之德行俾有所
持循乎則庶乎其可爾愚按訪落法武王此則
法文王夙夜敬止也未章佛時仔肩如臣鄰御
事之謂但稱其人未指其事事謂何顯德行也
敬之一章十二句

予其懲而誌後患莫予弇蜂自求辛螫肇允彼桃
蟲拚飛維鳥未堪家多難予又集于蓼

并音佛
拚音翻

懲有所傷而知戒也誌慎弇使也蜂小物而有
毒肇始允信也桃蟲鵽鵽小鳥拚飛貌鳥大鳥
也古語鵽鵽之雛化而爲鵬卽此蓼苦辛之物
也此亦訪落之意成王自言予何所懲而謹誌
後患乎使蜂而得辛螫信桃蟲而不知其能爲
大鳥此皆其所當懲者蓋喻管蔡之事也然我
方幼冲未堪多難而又集于辛苦之地群臣柰
何捨我而弗助哉詹山蘓氏曰成王始信管蔡

而疑周公既而悟其奸故曰予其懲而後患也

小德一章八句

載芟載柞其耕澤澤

芟音杉 柞音宰 澤音釋

除草曰芟除木曰柞周官柞氏掌攻草木是也澤澤解散也此專言新墾之田者其用力尤難故也

千耦其耘徂隰徂畛

耘去田間草也二人爲耦千耦其耘言其多也隰爲田之處畛田畔也或徂隰或徂畛言耕夫

遍野野無曠土也

侯王侯伯侯亞侯旅侯疆侯以有噉其饕思媚其婦有依其士有略其耜俶載南畝

噉他感反畝叶蒲委反

主家長伯長子亞仲叔旅衆子弟也疆界也以左右之也曰主曰伯統而言之曰亞曰旅分而言之也侯在中間之人責任尤重故其疆界之一定而不容紊群力之揮使而不容諉也噉衆飲食聲媚順依愛士夫也前曰其耕澤澤初反土也今曰俶載南畝則將種矣

播厥百穀實函斯活

播初下種也。函含活生也。既播之後，其實始含氣而生也。

驛驛其達，有厭其傑。

達叶佗悅反
厭平聲

驛驛苗生貌，達出土也。厭受氣足也。傑先長者。

厭厭其苗，縣縣其庶。

標音

縣縣詳密貌。庶耘也。華谷嚴氏曰：莠耘，庶皆除草也。莠與柞並言，是新闢田而除地上之草也。既耕而耘，是反土而除土中之草根也。既苗而庶，是除苗間之草也。

載穫濟濟，有實其積。萬億及秭，爲酒爲醴。烝畀祖

妣以洽百禮

積音漬

濟濟人衆貌實積之實也積露積也酒三酒也醴五齊也烝冬祭名畀予也以洽百禮言既烝畀祖妣而達之祭祀賓客無不治也

有飴其香邦家之光有椒其馨胡考之寧

飴音卯

飴芬香也卽酒醴芬芳之氣也胡壽也周書謚法保民耆艾曰胡是也夫以燕享賓客則邦家之所以光也以供耆老則胡考之所以安也

匪且有且匪今斯今振古如茲

且此也振極也言非獨此處有此而今時為然

也蓋自極古以來其耕穫之方享祀之儀已如此矣自古以來皆如此而繼此以往尤願其勿替也安城劉氏曰第一節言墾土第二節言治田第三節言男女長幼齊力于始耕第四節言苗生第五節言苗生之盛第六節言耘第七節言收入之多以供祭祀第八節又言可以待賓養老第九節則追言田事之所繇來者遠也載芟一章三十一句

麥麥良耜載南畝

麥麥嚴利也孔氏曰是办利之狀謂耜之入地

而嚴利也倣載始有事也

播厥百穀實函斯活

解見前篇

或來瞻汝載筐及其饑伊黍

瞻汝婦之來飢者筐筥饑具也

其笠伊糾其鉶斯趙以薅茶蓼

趙直了反
婦音蒿

糾笠之輕舉也鉶除草器趙刺薅去也茶陸草

蓼水草一物而有水陸之異也田有原有隰故

並舉之耳

荼蓼朽止黍稷茂止

朽壞也毒草朽則土熟而苗盛故黍稷茂也

穫之掙掙積之栗栗其崇如墉其比如櫛以開百

室

掙音室比去聲櫛側瑟反

掙掙穫聲也栗栗積之密也崇墉高大貌櫛理髮器言密也百室一族之人也五家爲比五比爲閭四閭爲族族人輩作相助故同時入穀也百室盈止婦子寧止

盈滿寧安也百室旣盈婦子于是寧處蓋農事勤動不得安寧今農事已畢故各享其樂且婦人主爨穀旣盈則其心亦安矣

殺時特牡有捄其角以俶以續續古之人

特音持捄音求

黃牛黑唇曰特捄曲貌續謂續先祖以奉祭祀

也眉山蘓氏曰以俶以續興來歲繼往歲也續古之人亦上篇振古如茲之意第一節言始耕第二節言苗生第三節言餉田第四節言耘苗第五節言苗盛第六節言收穫之多而齊第七節言樂豐年第八節言田事畢而以祭祀也

良耜一章二十三句

已上二篇似爲秋成祭先祖之詩朱子以爲卽豳頌也

絲衣其紃載弁俵俵自堂徂基自羊徂牛鴈及鳧鴈觥其觶旨酒思柔不吳不敖胡考之休吳音

話

絲衣祭服也紃絮貌載戴也弁爵弁也士祭于王之服俵俵恭順也基門塾之基鴈大鴈鳧小鴈也觥設兠觥之貌柔和吳譁敖傲也此亦祭而飲酒之詩言此服絲戴弁之人升門堂視壺濯濯豆之屬降徃于基告濯具又視牲從羊至牛反告克已乃舉鼎竊告潔禮之次也又能謹其威儀不謹譁不急傲故獲壽考之福如此慶源輔氏曰首二句言其衣冠鮮潔而整肅也

三四已下五句言其行禮順習而有序也八九句言其威儀敬靜而謹飭也如是則宜乎得壽考之福矣或問何謂序曰告濯具省噐也告充省牲也告潔省蠲也總不離乎一敬也

絲衣一章九句

於鑠王師遵養時晦時純熙矣是用大介我龍受之蹻蹻王之造載用有嗣實維爾公允師

蹻音矯

鑠威遠循熙光介甲也所謂一戎衣也龍寵也蹻蹻武貌造爲載則公事允信也此頌武王之功言其初雖有鑠然甚盛之師然何敢以黷耀

哉而退自循養與時俱晦不見其形迹直至時不可掩既純光矣然後一着戎衣而天下翕然大定此其所以爲武王之武也後王於是寵而受此蹻然之武功其所以嗣之者亦惟武王之事是師可也不先時而動不後時而靡王之用武也能如是是其爲武王也已

酌一章八句 酌字疑卽與鑠音同而字或訛蓋篇首卽於鑠王師也註以爲舞勺且疑其不用詩中字名篇皆非

綏萬邦屢豐年天命匪解桓桓武王保有厥士于

以四方克定厥家於昭于天皇以間之

桓桓武貌皇君間代也言武王君天下以代商也此亦頌武王之功夫大軍之後必有凶年而武王克商則除害以安天下故屢獲豐年之祥傳所謂周饑克殷而豐年是也此雖天命之適然乎而求之者徃徃而不得其故蓋此相相之武王保有其士而用之于四方以定其家功德上昭于天故能君有天下也天意在惜賢以安四方當殷紂虐害忠良殘刻百姓之時而武王能保賢以靖四方與天心合自然轉歎而爲

豐矣

桓一章九句

文王既勤止我應受之數時釋恩我徂維求定時
周之命於釋思

春秋傳以此爲大武之三章而序以此爲大封
於廟之詩蓋武王時封賞功臣人見其爲新造
之恩典也而武王不敢自居乃言是文王之功
德在于人心而可釋思者也以是而往求天下
之安定則庶乎其可矣然則受其封賞者又何
可以不釋思文王之德也乎 文德謂何勤止

是也勤止卽緝熙之敬止也內爲緝熙而外則勤止也

賁一章六句

於皇時周陟其高山隳山喬嶽允猶翕河敷天之下衷時之對時周之命

高山泛言山耳隳則其狹而長者喬高也嶽則其高而大者允信也猶與繇同翕河言翕受乎河水也登山而猶翕河言無所不容受也衷聚對蒼也言美哉周也其巡守登此山以柴望信猶納乎百川而無所間隔歟凡以敷天之下莫

不有望於我故聚而朝之于方嶽以咨其意此
成周之命然也黃氏曰得天必告于名山大川
禮也舜受天下于堯猶必望于山川徧于群神
受命之始不得不然也而况武王革命之主乎
故哀時之對者哀集其神而對之以祭祀也時
周之命者能懷柔百神則受命長久矣

般一章七句

原缺

首篇自見不曰風而曰頌者風則有美刺矣刺者見于他國獨存其美者崇美故曰頌也

駟駟牡馬在坰之野薄言駟者有驕有皇有驪有

黃以車彭彭思無疆思馬斯臧

駟音局驕音聿彭叶鋪卽反

駟駟腹幹肥張貌邑外謂之郊郊外謂之牧牧外謂之野野外謂之林林外謂之坰必牧于野者避民居與良田也驪馬白跨曰驪黃白曰皇純黑曰驪黃驂曰黃彭彭盛貌思無疆言其思之深廣無窮也臧善也此言僖公牧馬之盛繇其立心之遠故美之曰思無疆則思馬斯臧矣

易師出以律否臧凶衛風秉心塞淵猷牝三千
皆此意也

駟駟牡馬在坰之野薄言駟者有騅有駟有駟有駟
騅以車任任思無期思馬斯才

騅音佳駟任俱音

蒼白雜毛曰騅黃白雜毛曰駟赤黃曰駟青黑
曰騅任任有力也無期猶無疆也才材力也

駟駟牡馬在坰之野薄言駟者有騅有駟有駟有駟
雜以車釋釋思無斁思馬斯作

騅音駟駟音留釋
斁俱叶戈灼反

青驪驪曰驪色有深淺斑駁如魚鱗今之連錢
驄也白馬黑鬣曰駟赤身黑鬣曰駟黑身白鬣

曰雒繹繹不絕貌數厭也作奮起也

駟駟牡馬在坰之野薄言駟者有駟有駟有驥有

魚以車祛祛思無邪思馬斯徂

駟音因駮音逆
驛音簞

陰白雜毛曰駟陰淺黑色今泥驄也彤白雜毛

白駮毫肝曰驛毫在肝而白也二目白曰魚似

魚目也祛祛強健也徂行也無邪正也孔子曰

詩三百一言以蔽之曰思無邪蘇氏曰昔之爲

詩者未必知此也孔子讀詩至此而有合於其

心焉是以取之。蓋斷章云爾。愚按思無邪者亦

以尊周攘夷之謂也。霸主欲尊周，不得不借魯。

以爲重借魯以爲重則齊桓之功皆魯僖之功也故曰思無邪馬斯徂無邪乃心于王室也徂者往而有功也

駟四章章八句

有駟有駟彼乘黃夙夜在公在公明明振振鷺鷥于下鼓咽咽醉言舞于胥樂兮

明叶謨郎反駟音柳

駟馬肥強貌明明辨治也振振群飛貌鷺鷥羽舞者所持或坐或伏如鷺之下也咽與淵同鼓聲之深長也胥相也醉而起舞以相樂也

有駟有駟彼乘牡夙夜在公在公飲酒振振鷺鷥

驚于飛鼓咽咽醉言歸于胥樂兮

驚于飛舞者振作驚羽如飛曹氏曰上章醉言舞以樂成之也此章醉言歸以禮節之也

有駟有駟彼乘駒夙夜在公在公載燕自今以始歲其有君子有穀詒孫子于胥樂兮

青驪曰駒今鐵驄也載則有有年也穀善詒遺也舊說此燕飲而頌禱之詞虞源輔氏曰駟彼乘黃是指來燕者所乘之馬故因以起興在公明明所謂精白一心以承休德也自今以始歲其有爲生民之慮切矣君子有穀詒孫子爲

後世之慮深矣

有駟三章章九句

思樂泮水薄采其芹魯侯戾止言觀其旂其旂
旂旂音柳聲噦噦無小無大從公于邁旂音柳噦音嗜

思發語詞泮水泮宮之水也諸侯之學鄉射之
宮謂之泮宮其東西南方有水形如半壁以其
半於辟雍故曰泮水而宮亦以之名也芹水菜
戾至旂飛揚也噦噦和也小大從公言國中
人無長幼皆從而往也

思樂泮水薄采其藻魯侯戾止其馬蹻蹻其音昭

昭載色載笑匪怒伊教

蹻蹻盛貌昭昭明亮意其音昭昭者謂公之德音明顯不因馬之盛而或晦也然音雖顯而氣則和是故載色載笑卽之溫也匪怒伊教循循善誘也如此則僖公之善于育才可見矣

思樂泮水薄采其菲魯侯戾止在泮飲酒旣飲旨

酒永錫難老順彼長道屈此群醜

菲叶謨九反
老叶魯吼反

邠鳧葵也葉大如手赤圓而滑江南人謂之葇

菜難老猶言不老祝其壽考也長道猶大道也

屈服醜衆也屈群醜便已含淮夷在其中

穆穆魯侯敬明其德敬慎威儀維民之則允文允武昭假烈祖靡有不孝自求伊祐

假與格同烈祖周公魯公也內能敬其明德外能慎其威儀表裏盡善此民之所以爲則也上文載色載笑匪怒伊教所謂允文也順彼長道屈此群醜所謂允武也魯侯兼備衆善信乎能盡孝道以自求多福矣

明明魯侯克明其德旣作泮宮淮夷攸服矯矯虎臣在泮獻馘淑問如臯陶在泮獻囚

馘音號陶叶夷周反

矯矯武貌馘所格者之左耳也淑善也問訊囚

也蓋古者出兵受成于學及其反也釋奠於學
而以訊馘告故詩人因魯侯在泮而願其有是
功也

濟濟多士克廣德心栢栢于征狄彼東南烝烝皇
皇不吳不揚不告于訥在泮獻功

吳音謹

廣推而大之也德心善意也狄猶邊也東南謂
淮夷也烝烝皇皇盛也不吳不揚肅也不告于
訥師克而和不爭功也訥訟也言無以爭訟之
事告于治獄之官也

角弓其觫束矢其搜戎車孔博徒御無數既克淮

夷孔淑不逆式固爾猶淮夷卒獲

逆叶弋灼反
宜脚反

鯨弓健貌五十矢爲束或曰百矢也搜矢疾聲也博廣大無數言競勸也逆違命也蓋能審固其謀猷則淮夷終無不獲矣

翩彼飛鵙集于泮林食我桑黹懷我好音憬彼淮夷來獻其琛元龜象齒大賂南金

黹音甚憬音耿
琛音甚

鵙惡聲之鳥黹桑實也憬覺悟也琛寶也元龜尺二寸象齒象牙也賂遺也南金荆揚之金也三山李氏曰書載伯禽宅曲阜徐戎並興是淮夷世爲魯患故願僖公能使之順服貢獻如此

與昆夷喙不同矣

泮水八章章八句

閟宮有恤實實枚枚赫赫姜嫄其德不回上帝是依無災無害彌月不遲是生后稷降之百福黍稷重穰稊稷苾麥奄有下國俾民稼穡有稷有黍有稻有秬奄有下土纘禹之緒

閟深閟宮廟也恤清靜實實鞏固枚枚磐密也姜嫄生后稷者回邪也依眷顧也先種曰稊後種曰稊奄有下國封于郇也緒業也禹治洪水既平稷乃播種百穀二者皆以利民故謂之繼

禹之緒

后稷之孫實維太王居岐之陽實始翦商至于文武纘大王之緒致天之届于牧之野無貳無虞上帝臨汝敦商之旅克咸厥功王曰叔父建爾元子俾侯于魯大啓爾宇爲周室輔

功叶居古反

翦斷也太王自豳徙居岐陽四方之民咸歸往之於是而王迹始著蓋有翦商之漸矣太王雖未始有是志然其始得民心王業之成實基於此也屆極至虞慮也無貳無虞上帝臨汝猶大明篇之上帝臨汝無貳爾心也敦治之也咸同

也言輔佐之臣同有其功而周公亦與焉者王
成王叔父周公也元子魯公伯禽也啓開宇居
也爲周室輔言封伯禽不特爲魯啓疆乃所以
爲周之屏翰也此章推言后稷而下至于周公
伯禽也

乃命魯公俾侯于東錫之山川土田附庸周公之
孫莊公之子龍旂承祀六轡耳耳春秋匪解享祀
不忒皇皇后帝皇祖后稷享以騂犧是饗是宜降
福既多周公皇祖亦其福女

犧鹿宜虛何二反
宜牛奇牛何二反

上章既告周公以封伯禽之意此乃言其命魯

公而封之附依也庸功也小國之地不足五十里者不能自達于天子因大國以姓名通謂之附庸耳耳柔從也解急情忒過差也成王以周公有大功于王室故命魯公以夏正孟春郊祀上帝配以后稷牲用騂牡皇祖謂群公也此章以後皆言僖公致敬郊廟而神降之福國人稱願之如此也

秋而載嘗夏而福衡白牡騂剛犧尊將將毛魚鼈羹籩豆大房萬舞洋洋孝孫有慶俾爾熾而昌俾爾壽而臧保彼東方魯邦是常不虧不崩不震不

騰

三壽作朋如岡如陵

衡日即反歲音恣羹叶當
盧反慶祛羊反

嘗秋祭名福衡施于牛角所以止觸周禮封人
云凡祭飾其牛牲設其福衡是矣秋將嘗而夏
福衡其牛言夙戒也白牡周公之牲也駢剛魯
公之牲也白牡殷牲周公有王禮故不與文武
同魯公則無所嫌故用駢剛犧尊畫牛於尊腹
也或曰尊作牛形鑿其背以受酒也毛魚周禮
封人祭祀有毛魚之豚註云爛去其毛而魚之
也哉切肉也羹有二曰太羹鉶羹太羹太古之
羹渫煮肉澤而不和盛之以登貴其質也鉶羹

肉淳之有菜和者盛之以器故曰鉶羹大房半
體之俎足下有跗如堂房也萬舞名震騰驚動
也三壽三卿也願有壽考之三卿爲朋友皆如
涇陵之固祝其君臣同慶也

公車千乘朱英綠滕二矛重弓公徒三萬貝胄朱
綬烝徒增增戎狄是膺荆舒是懲則莫我敢承俾
爾昌而熾俾爾壽而富黃髮台背壽胥與試俾爾
昌而大俾爾耆而艾萬有千歲眉壽無有害

弓始弘反

千乘大國之賦也朱英所以飾矛綠滕所以約
弓二矛夷矛酋矛也重弓備折壞也徒步卒三

禹舉成穀也貝冑貝飾冑朱綬所以綴也增增
衆也戎西戎狄北狄廣當也荆楚之別號舒其
與國也懲艾承禦也僖公嘗從齊桓伐楚故以
此美之而併祝其昌大壽考也壽胥與試言壽
考者相與爲公用也卽上文三壽爲朋之意無
有害祝其壽而且康也

泰山巖巖魯邦所瞻奄有龜蒙遠荒大東至于海
邦淮夷來同莫不率從魯侯之功

泰山魯之望也唐與瞻同龜蒙二山名荒奄也
大東極東也海邦近海之國也淮夷來同則淮

浦諸夷在魯之南者同來歸附莫敢不相率而
順從矣言願公治其境內以服遠人也遂荒以
下皆期望之詞

保有鳧繹遂荒徐宅至于海邦淮夷蠻貊及彼南
夷莫不率從莫敢不諾魯侯是若

鳧繹二山名宅居也謂徐國也諾應詞若順也
泰山龜蒙鳧繹魯之所有其餘則國之東南勢
相連屬可以服從之國也

天錫公純嘏眉壽保魯居常與許復周公之宇魯
侯燕喜令妻壽母宜大夫庶士邦國是有既多受

社黃髮兒齒

母叶滿委反
有叶羽已反

常或作嘗其地在薛之傍許許田魯朝宿之邑也皆魯之故地僭假于諸侯而未復者魯人於是願公而光復之也令妻令善之妻壽母壽考之母有常有也兒齒齒落更生細者亦壽徵也此願公壽考以復魯之侵地宜其室家臣庶以保其境宇也

徂來之松新甫之柏是斷是度是尋是尺松栢有
罵路寢孔碩新廟奕奕奚斯所作孔曼且碩萬民
是若

徂來新甫二山名八尺曰尋鳥大貌路寢正寢也新廟僖公所脩之廟矣斯公子魚也作者營度之謂曼長碩大也萬民是若順民庶之望也末章則本其所以作是頌者言之取木于二山斷以度之或長或短而松之爲櫟楠者猶焉然而大則其爲樑柱者可知旣已成廟廟後之正寢又甚大焉則僖公所脩之規模宏遠可知矣又指董其功役之人而曰此實矣斯所作其制度長而且大以順萬民之望也作廟者如此則僖公可知矣

閼宮九章五章章十七句二章章八句二章
章十句

詩經剖疑卷之二十四

閩中後學曹學佺謹撰

商頌

契爲舜司徒而封于商傳十四世而湯有天下
其後三宗迭興及紂無道爲武王所滅封微子
啓于宋脩其禮樂以奉商後其後政衰商之禮
樂日以放佚七世至戴公時大夫正考甫得商
頌十二篇于周太師歸以祀其先王至孔子編
詩而又亡其七篇

猗與那與置我鞀鼓奏鼓簡簡衍我烈祖

鞀音挑

言身正公 卷十四
猗與歎詞那多置陳也鞀大鼓簡簡和大也行
樂也烈祖湯也記曰商人尚聲臭味未成滌蕩
其聲樂三闋然後出迎牲卽此是也

湯孫奏假綏我思成鞀鼓淵淵嘒嘒管聲既和且
平依我磬聲於赫湯孫穆穆厥聲

嘒音噉

湯孫主祭之時王也假與格同言奏樂以格于
祖考也綏安也思成言安我以所思而成之人
謂祖考來格也夫禱而思之祭而如有見聞則
成此人矣淵淵深遠也嘒嘒清亮也磬玉磬也
堂上升歌之樂言鞀鼓之深遠管聲之清亮皆

依玉磬以爲音節信乎盛哉湯孫其樂聲如此甚美也

庸鼓有數萬舞有奕我有嘉客亦不夷憚

庸鏞通數言盛奕言序也蓋上文之執管作于堂下聲依乎玉無相奪倫至此則九獻之後鐘鼓交作萬舞陳于庭而祀事畢矣嘉客先代之後來助祭者夷悅也亦不夷憚言皆悅憚也曹氏曰湯孫秦假綏我思成始焉人固因樂以致其感格之效也於赫湯孫穆穆厥聲終焉樂固因人而成其和聲之美也至于鏞鼓之數數然

而盛也萬舞之奕奕然而有序也則不特幽有以感乎神而嘉賓在位亦無不夷懌者矣獨言嘉賓者尊尚之也一說不敢自安之

自古在昔先民有作溫恭朝夕執事有恪

恪敬也溫恭朝夕卽致恪之意執事祭祀奏樂之事作行也言古人有行之者不可忘也卽周頌云愷今自今振古如茲之謂

顧予烝嘗湯孫之將

將奉也言先王其尚顧我烝嘗哉此湯孫之所奉者致其丁寧之意庶幾其顧之也序云那祀

成湯也

那一章二十二句

嗟嗟烈祖有秩斯祐申錫無疆及爾斯所

烈祖湯也秩常申重也爾主祭之君蓋自歌者
指之也斯所猶言此處也言烈祖有秩秩無窮
之福可以申錫于無疆是以及于爾今王之所
而脩其祭祀如下文所云也

既載清酤賚我思成亦有和羹既戒既平醴假無
言時靡有爭綏我眉壽黃耆無疆

酤酒賚予也思成義見上篇和羹味之調也戒

夙戒平猶和也儀禮于祭祀燕享之始每言羹
定盞祭以羹熟爲節然後行禮定卽戒而平之
之謂也醴中庸作奏義與上篇同盞古音奏族
相近族聲轉平而爲醴耳無言無爭肅敬而齊
一也言其載清醑而與我以思成矣及進和羹
而敬肅之至則又綏我以眉壽黃耇之福也

約軼錯衡八鸞鶴鷄以假以享我受命溥將自天

降康豐年穰穰來假來饗降福無疆

衡叶戶卽反
享叶虛良反

約軼錯衡八鸞見采芑篇鶴鷄卽瑯瑯也言助

祭之諸侯乘是車以假以享于祖宗之廟也溥

廣將大也穰穰多也言我受命既廣大而天降
以豐年黍稷之多使得以祭祀也假格饗受也
人既助之天又應之然後祖宗來格而享其祭
報之以無疆之福矣末又丁寧之曰其顧予烝
嘗哉此湯孫之所奉也傳云烈祖祀成湯也

烈祖一章二十二句

天命玄鳥降而生商宅殷土芒芒古帝命武湯正
域彼四方

玄鳥皐也春分玄鳥降高辛氏之妃有娥氏女
簡狄祈於郊禱皐遺卵簡狄吞之而生契其後

世遂爲有商氏以有天下宅居也殷國名芒芒
大貌古昔帝上帝也武湯以湯有武德而號之
書曰惟我商王布昭聖武是也正治域封境也
此亦祭祀宗廟之樂而追叙商人之所繇生以
及其有天下耳

方命厥后奄有九有商之先后受命不殆在武丁
孫子

始叶養里反

方命厥后四方諸侯無不受命也九有九州武
丁高宗也言商之先后歷世受天命而不危殆
故今武丁子孫猶賴其福也

武丁孫子武王靡不勝龍旂十乘大禘是承

勝音升

武王湯號而其後世亦以自稱也龍旂諸侯所
建交龍之旂也大禘黍稷承奉也言武丁孫子
今襲湯號若其威武無所不勝於是諸侯無不
奉黍稷以來助祭也

邦畿千里維民所止肇域彼四海

止居肇開也言王畿之內民之所止不過千里
而其封域則極乎四海之廣矣蓋京師爲諸夏
之本王圻之內人心安止則四海雖廣皆在其
統理中也

四海來假來假祈祈景負維河殷受命咸宜百祿
是何

假與格同祈祈衆多貌景山名商所都也見殷
武卒章左傳亦曰商湯有景亳之命也負與下
篇幅隕義同蓋言周也河大河也言景山四周
皆大河也何任也春秋傳作荷謂擔負天之多
福也

玄鳥一章二十二句

濬哲維商長發其祥洪水芒芒禹敷下土方外大
國是疆幅隕既長有域方將帝立子生商

此祀成湯而配以伊尹之詩肅深哲知長久也
方四方外大國達諸侯也幅猶言邊幅墮作員
謂周也有娥契之母家將大也言商世世有濬
哲之君其受命之祥已發見久矣方禹治洪水
以外大國爲中國之疆竟而幅員廣濶之時有
娥氏始大故帝立其女之子而造商室也蓋契
於是時始爲司徒掌布五教于四方而商之
受命實基於此

玄王桓撥受小國是達受大國是達率履不越遂
視既發相上烈烈海外有截

撥必烈反達他悅反
方月反

玄王契也玄者微遠之稱或曰以玄鳥降而生也
也相武撥治受承通達也受小入國無所不達
言無所不宜也率循履禮越過發應也言契能
循禮而不踰越遂視其民則既發以應之矣相
土契之孫也契十昭明昭明子相土至是而商
益大四方諸侯歸之截然整齊矣其後湯以七
十里起豈嘗中衰也歟慶源輔氏曰契爲司徒
初不見其用武然文武乃君德之不可偏廢者
契旣封爲國君則是當有武德始能撥亂以爲
治也又至其孫相土之時而益光大整齊矣此

起下文至成湯也

帝命不違至于湯齊湯降不遲聖敬日躋昭格遲
遲上帝是祇帝命式于九圍

齊會也湯齊言至湯而王業成與天命會也降
猶生也遲久祇敬式法也九圍亦九州也商之
先祖既有明德天命未嘗去之以至于湯湯之
生也應期而降適當其時而聖敬又日躋升以
昭假于天久而不息惟上帝是敬故帝命之以
爲法于九州也

受小球大球爲下國綴旒何天之休不競不綽不

言系下公 卷十 七
剛不柔敷政優優百祿是適

小球鎮圭尺有二寸大球大圭三尺皆天子之所執也下國諸侯也綴猶結也旒旗之垂者蓋湯受命爲天子而爲諸侯所係屬如旗之繆爲旒所綴著也何荷競強練緩也言其負荷天休而敷布政事強弱剛柔之適宜而又寬裕不迫是以爲百祿之所適聚也

受小共大共爲下國駿厖何天之龍敷奏其勇不

震不動不難不竦百祿是總

厖叶莫孔反
龍丑勇反

共珙通合珙之玉也駿大厖厚龍龍也敷奏其

勇猶言大震其武功也難恐竦懼也董氏謂駮
尾爲馬則與上章綴旒義相顯皆是譬喻綴旒
以喻爲諸侯所附著駮尾以喻能乘載乎諸侯
也此惟德厚者能之

武王載旆有虔秉鉞如火烈烈則莫我敢曷苞有
三蘖莫遂莫達九有有截韋顧旣伐昆吾夏桀

武王湯號虔敬也言恭行天討也曷過通苞本
也蘖旁生萌蘖言一本而生三蘖也本指夏桀
蘖指韋顧昆吾皆其黨也鄭氏曰韋彭姓顧昆
吾邑言湯旣受命載旆秉鉞以征不義如火之

烈烈當天其誰禦之是故桀與三孽皆莫能遂其惡而天下截然歸商矣初伐韋次伐顧次伐昆吾乃伐夏桀當時用師之序如此

昔在中葉有震且業允也天子降于卿士實維阿衡實左右商王

葉世震懼業危也天子指湯卿士伊尹也阿依衡平伊尹之官號也慶源輔氏曰昔在中葉有震且業分明是指相土之後成湯以前中衰之時言也允也天子言湯之爲天子當乎人心降于卿士且伊尹不徒生乃天爲湯而錫之也左

右商王謂輔佐湯以成王道也。繇此觀之，則湯爲百世不遷之烈祖，而商之孫子凡有大享于先王而伊尹以佐命元臣得與於享可知矣。

長發七章一章八句四章章七句一章九句一章六句

捷彼殷武奮伐荆楚，桀入其阻，裒荆之旅，有截其所。湯孫之緒。

桀面規反

捷疾貌。殷武，殷王之武也。桀冒裒聚也。湯孫謂高宗，蓋自盤庚沒而殷道衰，楚人叛之。高宗毅然用武以伐其國，入其險阻，以致其衆盡平其

地使截然齊一皆高宗之功也

維女荆楚居國南鄉昔有成湯自彼氐羗莫敢不
來享莫敢不來王曰商是常

享叶虛
良反

氐羗夷狄國在西方享獻也世見曰王高宗旣
克楚乃告之曰爾雖僻遠亦居吾國之南耳昔
成湯之世雖氐羗之遠猶莫敢不來朝曰此商
之常禮也况汝荆楚曷敢不至哉

天命多辟設都于禹之績歲事來辟勿予禍適稼

穡靡解

適音譎

多辟諸侯也來辟來王也適譎通言天命諸侯

各建都邑于禹所治之地而皆以歲事來至于
商以祈王之不譴曰我之稼穡不敢懈也庶可
以免咎矣言荆楚既平而諸侯畏服也語及稼
穡者天下無事則民得盡力于南畝以農事爲
重也

天命降監下民有嚴不僭不濫不敢怠遑命于下
國封建厥福

監視嚴威也僭賞差濫刑過遑暇封大也言天
命降監不在乎他在民之視聽則下民亦有嚴
矣惟賞不僭刑不濫而不敢怠遑則天命之以

天下而大建其福此高宗所以受命而中興也
商邑翼翼四方之極赫赫厥聲濯濯厥靈壽考且
寧以保我後生

商邑王都也翼翼整敕貌極表赫赫顯威濯濯
光明也言高宗中興之盛如此壽考且寧云者
蓋高宗之享國五十有九年以保我後生謂福
及其後嗣子孫也

陟彼景山松柏丸丸是斷是遷方斲是虔松栢有
誕旅楹有閑寢成孔安

景山名商所都也丸丸直也遷徙方正也虔戮

貌挺長貌旅衆閑大也寢廟中之寢安所以安
高宗之神也此蓋特爲百世不遷之廟不在三
昭三穆之數旣成始耐而祭之之詩也序云殷
武祀高宗也

殷武六章三章章六句二章章七句一章五
句